

www.BibleForChildren.org

Mateo 26



Paskuapa
sugta puncha
pisikuura,
Jesuska Betania
puibluma rirka
Lázaro kaugsakuskama.
Chi Lázaro wañuskatami
kaugsachiska karka. Mariaka,
chipi mikunakunkama, sug
librasina nardo suti suma
asna asiti iapa bali kulkiwa
randiskata charirispa, Jesuspa
chakikunapi tallirka. Nispaka,
kikinpa agchawa tustachirka. Chasa talliura,
chi wasi ukupi iapa suma asnaimi tukugsamurka.



Nigpika chungá iskaí Jesús agllaskakunamanda Judas Iskariote sutika, iaia sasirdutikunapagma rispa, nirkakunata: —Jesusta apichisakichita. Chasa uiaspaka, sumaglla kuntintarispa nirkakuna: —Kulkimi kamta karasunchi—. Chiuramandaka, Judas maskai kallarirka, imasa Jesusta apichingapa.



Chasa uiaspa chi katiraiagkuna,
imasa Jesús niskasina
ruragrispaka, allichirkakuna, paskua
mikungapa. Chara mikunakunkama
Jesús, tandata makipi charirispa,
"Pai Siñur" Taita Diusta nirka.
Tandata pitichispa, katiraiagkunata
kuaspa, kasami nirka:
—Chaskiwaichi, mikungichi.
Kai, nukapa
kuirpumi ka.



Nispaka, sug binu kupata makipi
charirispa, "Pai Siñur" Taita
Diusta nispa, paikunata kuaspa,
kasami nirka: —Tukuikuna
upiaichi. Kai, nukapa iawarmi ka,
Taita Diuswa i runakunawa ikuti
pasinsiachirispa sumaglla
tukungapa. Achkakunamandami
chi iawar llugsispa,
icharingapa ka,
pandariikunata
pasinsiangapa.



Kasapasmi nirka: —Simón, Simón, uiamui. Iaia kukuka
maskakumi, trigalta chabsichigsina, kamkunata
wagllichingapa. Nukaka, kammanda Taita Diusta
mañarkanimi, kam mana nukamanda suma iuiaita
sakingapa. Kam, Taita Diuswa ikuti tigraspaka, kai
waugkindikunata allilla iuiachispa kangi.



Chiura, Simón ainirka: —Taita waugki, kamta karsilpi
wichkaspá, wañuchingapa apagpikunapas, nuka
kamwami rintrani. Chasa niura, Jesuska Pedrola
nirka: —Kasami niiki: kai tuta, gallu manara
kantagpimi kamka kimsa biaji nukamanda ningapa
kangi: "Paita mana rigsinihu".



Jetsemaní suti wirtapi
chaiagrispaka, Jesuska
katiraiagkunata nirka:

—Kaillapi tianakuichi,
nuka chi ladu Taita
Diusta mañaspa
rimagrinkama.

Kasapasmi nikurka— Kam
Taitiku, tukuimi pudingi.
Kai iapa llakiita
anchuchiwai. Nuka chasa
munakugpipas, nuka imasa
munaskasina mana
tukuchu. Kam imasa
munaskasina rurai.



Chimanda Judaska, suldadukunata, i iaia sasirdutikuna
i fariseokuna kachaska alwasilkunata pusaspa, chi
wirtama chaiagrirkakuna, lintirna, nina sindi i
wañuchinakudiru charispa. Chasa tapuspa,
sug Jesuswa kagpuraka, ispada
surkuspa, iaia sasirdutipa lutrinta
piaspa, alli ladu rinrita ialigta
kuchurka. Jesuska nirka:
—Chilla. Ianga
kawaichi—. Chasa nispaka,
chi runapa rinrita
tuparispa, aliachirka.



Jesusta apispaka, chi runakuna iaia sasirdutipa
wasima chaiachigrirkakuna. Pedroka, karu karullapi
katichikurka. Chi wasi kancha chaugpipi nina
sindichispa, muiugta
tiarirkakuna. Pedropas,
paikunawa tiarirka.



Chiura iaia sasirdutipa
sug lutrin, Pedro rinrita
kuchuska runapapuraka,
tapurka: —Jesús kadiru
wirtapi, ¿manachu nuka kamta
kawarkaiki? Ikuti Pedro ainirka:
—Chipika, nukaka manima
karkanichu. Chasa nigllapi,
gallu kantarka. Chasa
iuiarigsamuspaka, kanchama
llugsispa, dillakii wakai kallarirka.



Nispaka tukui chipi kagkuna, atarispá,
Pilatos suti mandagpagma Jesusta
chaiachigrirkakuna. Chasa uiaspa
Pilatoska, Jesusta tapuchirka: —Kam,
¿judiukunapa atun mandagchu kangi?



Chiura, Jesús ainirka:
—Sutipami kam chasa
nirkangi. Pilatoska,
Jesusta kacharingapa
munakuspa, ikuti

rimarkakunata. Paikunaka
kaparirkakuna, nispa:

—Kruspi churai. Kruspi
churaspa wañuchii.




Chiura Pilatoska, Jesusta kruspi
klabangapa kacharka. Chimanda,
Jesusta llugsichispa aparkakuna.
Jesuska, krusta markaspa, Uma
Tullu suti pambama rii kallarirka.
(Chi pamba, hebreo rimaiwa suti
karkami Gólgota.)



Chipi chaiagriuraka, paita kruspi
klabarkakuna. Sug iskaikunatapas
paiwa sugllapi kruspi
atarichirkakuna, sug
sug kada ladu,
Jesuska
chaugpipi.



Indipas, lim amsaiarka. Diuspa atun wasi ukupipas
atun linsu arkaraiaska, chaugpi chaugpimi
Ilikirigsamurka. Chiura Jesuska, sinchi kaparirka,
kasa nispá: —Taitiku, nukapa
ispiritutami kamta
mingaiki—. Chasa
nispaka, wañurka.



Chimanda Arimatea puiblumanda
José suti runaka, Pilatospagma
rirka. Chi runa, judíu
mandagkunapura atun
taitami karka. Paika,
Diuspa suma mandai
chiamungapa
punchata
suiakurka.

Pilatospagma
rispaka, mana
manchaspalla
iaikugrispa,
Jesuspa kuirputa
mañarka.




Chiura Joseka, suma linsu
randispa, Jesusta krusmanda
uraikuchigrirka. Nispaka,
suma linsuwa maituspa,
murtajarka. Sug rumi
piñapi atun
utkuchiskapimi
Jesuspa kuirputa
churagrirkakuna.

Nispaka, utku
punguta sug
atun rumiwa
wichkarkakuna.



Warda punchapa allichidiru puncha
ña ialiura, kaiandi iaia
sasirdutikuna i
fariseokunaka
Pilatospagma
chaiagrirkakuna,
kasa nispa:
—Taita
waugki,



... nukanchi iuiarirkanchimi:
chi llulla runaka,
kaugsakunkama
kasami nirka: "Kimsa
punchapika ikutimi
kaugsaringapa kani".




Chiura paikuna, rispa, pambaraiaska
punguta siñalaspá, mas
suma wichkagrirkakuna.
Nispaka, suldadukunata
sakirkakuna, chipi
chapanakungapa.



Judiukunapa warda puncha ña ialiska
kaura, simana kallarii puncha u
dumingu pakarikuuraka,
María Magdalena sug
Mariawa rirkakuna
Jesús
pambaraiaskama,
kawangapa.


Chiura alpa, iapa
kuiurigsamurka.




Atun Taita Diuspa anjilsi, suma
luarmanda uraikumuspa, chima
kaillaiaspa, kawarigsamurka.

Nispaka, kilparaiaska
rumita anchuchispa, chi
awalla tiarirka. Chasa
kawaspaka, chi
pambaraiaska
punguta


chapanakug
suldadukuna,
iapa mancharispa,
chugchurispa,
wañuskasinasi
alpama
urmarkakuna.



Warmikunataka, anjil nirka:
—Mana manchanakuichi.
Iachanimi: kamkuna, Jesús
kruspi wañuskatami
maskanakungichi.
Kaipika mana kanchu.
Imasami pai kikin
nirka: chasami
kaugsarirka. Pai



Chi warmikunaka, chasa uiaspa, chimanda
utkalla anchurirkakuna. Mancharispa, alli
iuiarispa, kalparkakuna, Jesusta
katiraiagkunata willangapa.
Rinakugllapi, Jesús kikinka
paikunata kawarirka, "Puangi"
nispa. Chiura paikuna,
kungurispa, chakita ugllaspa,
paita



mucharkakuna.





Chiuramanda, chungá sug pái agllaska runakuna
mikuspa tianakuura, Jesuska kawarigsamurkakunata.
Paikuna mana paimanda suma iuiaskamanda, piñaspa
nirkakunata: —Nuka kaugsariskata kawawagkuna
kamkunata willagpipas, ¿imapatak mana uiarkangichi?
¿Imapatak, chituku ninakuskata uiaspapas,
kamkunapa uma upa tukuskasina kangichi? Iaia Jesús
chasa rimaspaka, suma luarma sikai kallarirka.
Suma luarpi chaiagrispaka, Taita Diuspa
alli ladu tiarigrirka.



Taita Dius, kai
alpamanda tukui
runakunata ña iapa kuiaspa, kikinpa
suglla wambratami kachamurka;
chasaka, paimanda tukui suma
iuiagkuna, puchukaringataka,
mana puchukaridiru kaugsaita
iukangapakuna.



Romanos 3:23

Tukuikunami pandarinchi. Chimandaka, Taita Dius atun sumaiachiskamanda iapa karupisinami karkanchi.

Romanos 6:23

Pandarispa ruragka, wañuitami chaskí. Ikuti Taita Diuska, nukanchipa Iaia Jesucristowa mana puchukaridiru suma kaugsaitami kará.

Hebreokunata 9:27

Imasami tukui runakunata chaiá, sug biajilla wañungapa; nispaka, Diuspa ñawi ladu justisiai tukugringapa:



Efesopi 2:8,9

Taita Dios suma kuiagmandami, kamkuna, paiwa suma iuiaripa, kispichiska tukurkangichi. Mana kispirirkangichichu kam kikinkunapa iuiaillawa. Taita Dios kikin karaskallawmi kispichii tukurkangichi. Kam kikinkuna allilla ruraskamanda mana kispirirkangichichu; chasaka, ñi pipas mana atuniachiripa ningapa: "Nuka kikinllami kispirirkani".

Romanos 10:9,10

Kamkunapa simiwa willaspami iukangichi, Jesús nukanchipa iaia kagta ninga. Kamkunapa iuiaiwami iukangichi suma iuiaringa, pai wañuskata, Taita Dios kaugsachiska kagta. Chasa iuiaiwa kagmandami kispichii tukungapa kangichi. Kamkunapa iuiaiwa Jesucristowa suma iuiariskamandami mana pandarig niraiangichi. Simiwa Jesucristomanda willagmandami kispichiitukungapa kangichi.



Juan 3:16,17 Taita Dios, kai alpamanda tukui runakunata ña iapa kuiaspa, kikinpa suglla wambratami kachamurka; chasaka, paimanda tukui suma iuiagkuna, puchukaringataka, mana puchukaridiru kaugsaita iukangapakuna. Taita Dios, kikinpa wambrata kai alpama mana kachamurka, kaimanda runakunata justisiai rurangapa. Nukanchita kispichingapami paita kachamurka.

1 Juan 5:11-13 Kasami Taita Dios willá: mana puchukaridiru suma kaugsaitami nukanchita karamuska ka. Chi kaugsaita paipa wambrawami karamuska ka. Chiwa, maikanpas Taita Diospa wambrawa suglla iuiyai chariraiag, chi kaugsaitapasmi iuká. Ikuti maikanpas mana Taita Diospa wambrawa suglla iuiyai chariraiagpika, manima chi kaugsaita iukanchu. Nuka willaskata kachanakuikichitami, kamkuna kasa iachangapa: kamkuna Taita Diospa wambrawa suma iuiarigkuna, mana puchukaridiru suma kaugsaitami iukangichi.



Mateo 26-28; Lucas 22-24; Juan 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Inga Bible (inb) © 2009, Wycliffe Bible Translators,
Inc. All rights reserved.

<https://live.bible.is/bible/INBWBT/MAT/1>

©2026 Bible for Children, Inc.

www.M1914.org

www.bibleforchildren.org

